

Rafizi: Jika berkuasa, PR akan lipat ganda pendapatan peneroka
The Malaysian Insider
22 April , 2012
Oleh Mohd Farhan Darwis

SHAH ALAM, 22 April — Pakatan Rakyat (PR) akan melipat gandakan pendapatan bulanan peneroka Felda bagi meningkatkan nilai hartanah jika dipilih mengambil alih Putrajaya, kata pengarah strategik PKR Rafizi Ramli hari ini.

Tambah Rafizi, PR juga akan menyerahkan kuasa mengurus tanah rancangan terbesar di dunia itu bagi membolehkan mereka berjaya dengan usaha peneroka.

“Sekiranya PR berjaya memerintah, kami memikirkan untuk melipat gandakan pendapatan peneroka. Kalau sekarang ini pendapatan mereka RM4,000 sebulan, kita gandakan menjadi RM10,000 sebulan.

“Kita perlu memberikan latihan kepada peneroka, generasi kedua dan ketiga supaya mereka dapat berbakti kepada Felda. Ada banyak cara nak bantu peneroka,” tegas Rafizi ketika berucap selaku ahli panel di Konvensyen Hala Tuju Felda anjuran Gabungan NGO-NGO Felda di sini.

Tambah Rafizi lagi, PR juga akan meningkatkan nilai tanah rancangan Felda melalui merancakkan kegiatan ekonomi di Felda, melalui suntikan modal kerajaan, bukannya dengan merampas tanah peneroka.

“PR juga akan meningkatkan nilai tanah rancangan Felda dengan menghidupkan suasana ekonomi di dalam Felda.

“Ini perlu dilaksanakan dengan bantuan kewangan daripada kerajaan, dan bukannya dengan merampas tanah dan hak peneroka,” tegasnya.

Justeru, beliau menegaskan, generasi peneroka dan generasi kedua dan ketiga peneroka perlu di beri latihan bagi menambah nilai hartanah mereka.

“Peneroka boleh mewujudkan syarikat dengan perkongsian sesama peneroka dengan keluasan tanah mereka. Jika ada anak-anak peneroka yang berkelayakan, perlulah melantik mereka menguruskan syarikat tersebut.

“Dengan ini, kepentingan peneroka akan terpelihara dan mereka akan menguruskan ekonomi mereka sendiri.

“Tindakan ini akan PR laksanakan selepas memegang kuasa dalam tempoh dua, hingga ke tiga tahun memerintah,” tambahnya.

Konvensyen di Universiti Industri Selangor (Unisel) ini turut disertai oleh panel-panel jemputan untuk membentangkan kertas kerja mereka bagi menerangkan keburukan

berkenaan penyenaiaan FGVH.

Konvensyen tersebut dirasmikan oleh Timbalan Presiden Angkatan Amanah Merdeka (Amanah) Tan Sri Abdul Kadir Syeikh Fadzir, serta antara panel yang hadir adalah, bekas Gabenor Bank Negara, Dr Rosli Yaakub, dan juga Pengarah Strategik PKR, Rafizi Ramli, termasuk Sasterawan Negara Datuk A. Samad Said.

The Malaysian Insider

Hakcipta © 2012 The Malaysian Insider

Source: <http://www.themalaysianinsider.com/bahasa/article/rafizi-jika-berkuasa-pr-akan-lip-at-ganda-pendapatan-peneroka/>